

ULTIMO HORA..ULTIMO HORA..EXCLUSIVO.. CHICHI PERALTA Y SON FAMILIA LO INAUGURA "HAVANA BEACH CLUB"..

E espectáculo lo ser dedica na Hildward Croes..

DEN AMBIENTE



**** Aki por aprecia Chichi Peralta hunto cu nos orguyo musico Hildard Croes, na kende e concierto lo ser dedica..**

**** Na ultimo hora DEN AMBIENTE a ricibi e noticia cu e luhoso night club Mr. Babillia (ex surfside) cual DEN AMBIENTE a publica diasabra ultimo cu lo bay ser habri cu un solo presentacion di Chichi Peralta y Son Familia, awor a cambia di nomber pa HAVANA BEACH CLUB.**

Pues e number a cambia, pero e fecha si a keda dia 19 di december proximo y cu nada mas y menos e grupo musical mas popular actualmente den henter Latino America cu ta CHICHI PERALTA Y SON FAMILIA, cual agrupacion nos orguyo musico internacional ta formando parti.

Mas aleu DEN AMBIENTE a ser informa cu e anochi aki lo ser dedica na Hildward Croes, kende sin duda merece e honor aki. Tambe por a compronde for di e organizadornan, cu practicamente tur cos ta cla pa ricibi Chichi Peralta y su musiconan, kendenan ta yega Aruba dia 18 di december.

Interes ta sumamente grandi pa e prome y unico presentacion di Chichi Peralta na Aruba, kendenan lo bay presenta cu Super Orquesta Quasi. For di dialuna awor caba e ticketnan lo ta riba mercado y esaki lo bay ta masha limita mes. E unico caminda pa compra e ticketnan aki ta solamente na ZAPP Music..

Exclusivo for di Hulanda..

ARUBIANA A SER COHE CABEZ ABAO DURANTE CERTAMEN MISS BLACK

**** For di Godfried Adem kende ta DEN AMBIENTE su coresponsal na Amsterdam, Hulanda, DEN AMBIENTE a ricibi e informacion cu un joven dama Arubiana na e momentonan aki ta pasando momentonan di hopi frustracion despues di a bin compronde cu durante di un participacion na un certamen di beyesa, el a ser tene afor, aunke e tabata un di e favoritonan pa bay cu e premio maximo. Ta trata di e beyesa Nathaly Russel kende tin dos aña ta residencia na Hulanda.**

E pesadia di dje a cuminsa despues di dia 21 di november ora cu den teatro Chassee na Breda, el a participa den e certamen di Miss Black Hulanda. Hunto cu 12 jovencita di colo el a tuma parti na e preparacion cual a dura seis luna. Awor a bin sali na cla cu e seis luna nan aki, el a ser usa pa e organizadora logra su propio meta.

E certamen di Miss Black tabata un farse total. Nathaly Russel mescos e joven dama yiu di Corsow Carina Lampe a ser usa pa e organizadora di e evento aki. Pero hunto cu seis otro jovencita surnameo cu tambe a participa den e evento aki nan a cuminsa un caso contra di e organizadora cu ta señora Anneke Wong Sie Kwie.

E prome actuacion ilisito di e señora menciona ta cu e organizacion di cual e ta yama "Ambition", ta cu e no tin derecho di existencia ya cu e no ta registra na ningun camara di comercio di ningun municipio di Hulanda. E ta un dama cu ta gusta su "One Man Show" y kende den e ultimo aña cual e ta organisa e evento aki na Hulanda, ya caba lo mester a enrikese su mes cu e practicanan straño aki. E tin e mihor cascan comercial cu ta su sponser. Ta trata di entre otro FA, HENNA y TOMMY HILL FIGURE.

Kico a pasa durante dje eleccion ta loke cu ocho di e participantenan di e certamen aki lo bay conta hues den un caso cu denter di poco nan lo cuminsa contra di señora Anneke Wong Sie Kwie. For di na prome momento cu el a sera contrato cu e jovencitanan aki e mester tabata sa cu e contrato aki no tin valides huridico ya cu e organizacion aki di dje pa ley no ta reconoci.

Durante e preparacionnan cu a dura seis luna e jovencitanan aki a nota cu tin cosnan straño ta tumando lugar. Pero mas straño ta cu e dama aki su primo ta frei e jovencita yiu di

Surnam cu a sali ganadora di e certamen aki y cu Anneke Wong Sie Kwie ta amiga di e mama di e dama di 17 aña, Danielle Isold.

Na momento cu amiganan y famia di e otro participantenan a drenta den e teatro na Breda, no tabatin luga pa nan sinta ya cu ta famia y conoci di Danielle Isold tabata sinta dilanti. Ora cu nan a reclama, a bisanan cu esaki ta pa ora cu Danielle Isold gana tur hende por subi riba podium mas liher. Un miembro di hurado cu ta un figura hopi conoci den mundo di deporte na Hulanda y kende awor aki a bira comerciante di paña a pasa y bisa Danielle Isold dilanti di otro participantenan cu te lo bay gana. Huradonan cu tabata presente pa vota pe jovennan aki, tabata tras di stage y nunca lo no por a mira e jovencitanan aki bon.

Na momento cu e ocho participantenan cu no tabata contento con cos a bay, a bisa Anneke cu nan lo bay cuminsa cu un caso contra di su persona, esaki a ofresenan casi 70 mil florin pa cabes pa no hibe corte, ya cu esaki lo pone den hopi problema.

Ayer a dilanti huez na Amsterdam e ocho mucha muhernan cu a ser usa pa e dama yiu di Surnam Wong Sie Kwie a entama un huisio sumario pa evita cu e planta di television Veronica dialuna awor lo pasa e filmacion di e certamen aki. Pero huez no a duna nan rason, y a bisa cu Veronica no ta esun cu ta meti y tampoco a comete algo contra di regla. Nan tabata kier pa huez a impedi Veronica pa pasa e filmacion aki ya cu na nan opinion no ta trata di un certamen di beyesa sin mas bien un asunto cu a ser regla entre Anneke y Veronica. Pa e publico den sala tabata algo straño pa mira cu cada biah e jovennan mester a ripiti cierto actonen y caminata riba tarima. Cada biah tabatin cu subi baha te ora cu e regisor tabata haya un "shot" bon. Caminda cu pa e regisor e "act" no tabata bon, nan mester a ripiti esaki dilanti di henter e publico.

Actuacion di e cuater representantenan di hurado tabata uno cu a keda cuestiona tambe y ta trata di un presentador di e programa di television pa Veronica mes. Veronica ta bay na gana hopi placa cu e transmision aki debi cu e ta ser hopi bon di sponser. Anneke Wong Sie Kwie lo mester a sera un contrato, ya cu e tin derecho exclusivo cu Veronica pa cual e lo mester a gana hopi placa, pa cual informacion



tambe nos coresponsal ta gosa di dje.

Anneke Wong Sie Kwie ta presenta su mes como un dama yiu di Surnam cu a logra masha cos na Hulanda y ta bisa cu el a traha pa hopi politico Hulandes. Asina el a bisa recientemente den un entrevista publica den un revista hulandes.

Pero esaki no ta kita cu huez lo por persigue pa actuacion ilisito caminda el a usa jovennan di colo Arubiano y Antillano pa asina e por gana placa cu nan. Aunke cu el a busca sponser pa nan, tog e muchanan mes mester a paga tur nan gasto di paña di biahe y tur otro cos cu a bin aserca.

E certamen aki tabata pa gana placa ta opinion di e dos jovencitanan Arubiana y yiu di Corsow. Algo pues di den famia. Tristo ta cu e jovencia Daniella Isold cu pa hopi di e coreografonan den mundo di moda y show, no ta un persona cu merece e titulo aki tampoco, lo te esun cu lo mester bay representa e joven damanan di colo cu ta biba na Hulanda den un certamen internacional cu lo bay tuma luga na Estados Unidos di Mis Beauty Black International.

Aki na algun siman lo tin un otro caso den corte na Amsterdam, e biah aki contra di señora cu a cohe tur hende cabez abao y ora ey tur puito lo sali for di bao di macuto ora cu testigonan ocular lo presenta pa boltu e macuto.

Si tur cos bay bon awetardi durante e programa di "Show di Poets" na Top 95 Fm entre 3'or pa 6'or, lo bay tin un entrevista cu Godfried Adem y tambe Nathaly Russel.